



Sesida dals

Communitgà ils

Protocol nr.

10 da zercladur 2024

12 da zercladur 2024

499/2024

Dumonda Gredig

concernent l'impurtanza per il Grischun da la sentenza dal TEDU davart il plant da las senioras per il clima

Resposta da la Regenza

En sias proceduras examinescha il Tribunal europeic dals dretgs umans (TEDU) a Strassbourg, sch'ils dretgs umans ch'èn francads en la Convenziun europeica dals dretgs umans (CEDU) èn vegnids violads. En la sentenza dals 9 d'avrigl 2024 davart il plant da l'Uniun Senioras per il clima Svizra vegn la CEDU interpretada sut l'aspect da l'Accord da Paris. L'Accord da Paris è vegnì ratifitgà dal parlament, è stà sutta-mess al referendum facultativ e fa ussa part da l'urden giuridic svizzer. En sia sentenza è il TEDU vegnì a la conclusiun, che la Svizra na cuntanscha betg las contribuziuns per la protecziun dal clima, ch'ella aveva garantì en l'Accord da Paris. Tenor il dretg federal vertent è per gronda part la Confederaziun cumpetenta per prender mesiras per proteger il clima. Tenor l'art. 10 da la Lescha davart il clima e l'innovaziun (Fegl uffizial federal 2022 2403) vegnan ils chantuns obligads d'ademplier ina funcziun d'exempel e da s'engaschar per cuntanscher netto nulla emissiuns en lur administraziuns centralas.

Tar la dumonda 1: Gea, la Regenza ha concludì l'onn 2016 ina strategia da clima chantunala cun diesch prioritads d'agir, dus da quellas en la protecziun dal clima ed otg en l'adattaziun al clima. Dapi l'onn 2019 elavuran la Regenza e l'administraziun l'incumbensa parlamentara davart il Plan d'acziun Green Deal per il Grischun (AGD), che prevesa da rinforzar la strategia da clima cun dapli meds finansials sco er da stgaffir basas giuridicas chantunalas per promover e per finanziair mesiras a favur da la protecziun dal clima e da l'adattaziun al clima. Uschia duain las finamiras da l'Accord da Paris pudair vegnir cuntanschidas areguard il chantun Grischun.

Tar la dumonda 2: Na. La limitaziun da la deducziun per pendularis ed ils supplements per carburants tutgan tar las pussaivladads da finanziaziun ch'èn vegnidas examinadas en il rom da l'elavuraziun da la Lescha davart la promoziun e la finanziaziun da mesiras per la protecziun dal clima e per l'adattaziun al clima en il Grischun (Lescha davart il fond per il clima, LCCLima). La taxa sin carburants è vegnida refusada, la limitaziun da la deducziun per pendularis è vegnida suspendida per in'eventuala etapa posteriura. Cun las funtaunas da finanziaziun tenor il sboz da consultaziun da la LCCLima pon vegnir realisadas en in'emprima fasa las mesiras a favur da la protecziun dal clima previsas dal Cussegl grond. La promoziun dal traffic public e dal traffic betg motorisà tutga tar las mesiras ch'èn vegnidas promovidas gia en il rom da l'etappa I dal AGD (guardar missiva carnet nr. 9 / 2023 – 2024, p. 808). Cun il credit supplementar per l'onn 2025 duain questas mesiras vegnir promovidas er durant in onn transitoric, fin che la LCCLima entra ed è en vigor.

Tar la dumonda 3: La Regenza na planisescha naginas ulteriuras activitads per realisar mesiras a favur da la protecziun dal clima ordaifer il AGD resp. ordaifer la LCCLima, ils quals èn vegnids elavurads per incumbensa dal parlament. Cun chattar variantas per projects d'infrastructura pli gronds en la construcziun da vias valan las consequenzas per l'ambient incl. l'effect sin il clima, ch'èn chaschunadas architectonicamain, gia oz sco criteris da giudicament resp. da valitaziun sin il stgalim dal project general. Per dar en l'avegnir dapli paisa a quests criteris, prevesa l'Uffizi da construcziun bassa da declarar las consequenzas per l'ambient areguard l'effect sin il clima explicitamain en equivalents da CO₂ e la grevizza totala per l'ambient en puncts da contaminaziun da l'ambient. Ils projects chantunals d'edifizis novs en il sector da la construcziun auta adempleschan autas pretensiuns da persistenza e cuntanschan ils standards pretendids, sco per exempel il standard MINERGIE-P.

Tar la dumonda 4: La Regenza s'engascha gia oz – tant sin plaun chantunal sco er sin plaun federal – activamain a favur da la protecziun dal clima.



En num da la Regenza

Il president:

Dr. Jon Domenic Parolini

Il chancelier:

Daniel Spadin